

# LIS PREDICJIS DAL MUINI

di pre Josef Marchet - Udin, 1965

## Il pignarûl

Ce vuelial dî che usgnot o seis cussî pôcs? Ah, il pignarûl! Cumò mi impensi che o ai lampât, vignint in glesie, Toni Sclese che al lave jù cuntun medili su la spale, plui lunc des predicjis di pre Scjefin. Dait un cuc inte arie, cumò che o tornais a cjase: nissune maravee che al vebi alçât di pêl il jubâl a cualchidun, chel temul, par fâ il fugareli plui biel dal circondari. E la zoventût e sarà ator a brascjam, a vinceis, a fassuts di soreâl... Si sa po! Lis tradizions a van rispietadis, massime chês che no disturbin la cussience e che no oblein a crussignâ inte scovacere de animate. Vêso fat il presepi sot il seglâr? Vêso metût chel tâl che al fâs la polente, chel altri che al mene la pigne, chê femenute che e va a aurî aghe cul buinç, chel che al rustîs lis bueriis, chel vieli che al sune la bulziche? E il mulin cu la muele che e côr suntun riul di stagnole? E il cjistiel cui manigolts che a fasin la vuaite cul spiçot su la spale? E cui sa, par cumbinazion, se si sês visâts di meti, in cualchi cjantonut, ancje la Madone cul Bambin e Sant Josef? Parcè che chei a son i ultins e si sta pôc a dismenteâsi di lôr. E vêso santificât il Nadâl cuntun biel dindi? E la gnot dal prin dal an cuntune cjoche? E la domenie di mieç cuntun fregul di ghiringhel e cuatri bolzaris in famee? Al mi à dit Tite Brucje che nol saveve cemût parâsi, par vie che lu vevin invidât cu la armoniche in siet vot cjasis, chê sere stesse: puare anime, ce vitis di fâi fâ!

Di po, Masut, tu che tu sês inscuelât e che tu vadis ogni dì a lei il sfuei inte ostarie di Baduscli, no ise vere che, ancje chest an, sot fiestis i gjornâi a jerin plens di robariis, di imbroieçs, di trucs, di sgrifignaments? Cjo, la zoventût e à dibisugne di carantans, par rispietâ lis tradizions! O viodarês di achì indenant, sul carnevâl, se nol tocjarà cori a cjase prin di gnot, par no cjatâ su la strade cualchidun cul façolet su la muse e un sclîçot di fier in man... a cirî la caritât! Simpri par vie des tradizions.

Sintît mo: jo o soi di chei di une volte, si lu sa; ma o soi a dius che, co si jere fantats noaltris, si mantignivin lis usancis miôr di cumò; ancje tantis bielîs usancis che in dì di vuê si son bielzà distudadis. Ma nol coventave ni disvuedâ i gjalinârs dal prossim, ni spietâ la int su lis stradis scuris, ni riscjâ di fâ cualchi setemane di taulaç, par amôr des usancis. E i pignarûi si ju faseve grancj e bie e fis, cence saltâ il rosari. No mo Jacum? No mo Blasut? No mo, Checusse? Voaltris o podês dîlu, o podês fâmi di testimoni, se no dîs il vêr.

Doman, messe cjantade ca sù, come il solit! O speri che su la albe des undis nol sedi plui nissun pignarûl di impiâ. E cun cheste us doi la buine sere.